

ZAŠTO NE UZIMAMO POUKU?

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji shvataju važnost rada na sebi i ne bježe od savjeta i promjena nabolje.

Braćo moja u Dini Islamu! Jedna stvar je sigurna i jasna – stanjem u svijetu niko nije zadovoljan. Niko osim, možda, prokleti šejtan. On zadovoljno trlja ruke, jer na svijetu nema niti jednog grijeha i niti jednog harama a da se ne čine. Zašto je takvo stanje, kada se već odavno zna šta je dobro a šta loše, kada se zna da je šejtan čovjekov neprijatelj i kada se zna da je šejtanov put put koji vodi u stranputicu i Vatru? Zato što ne uzimamo pouku? Svako je zadovoljan svojim znanjem i svojim stanjem, misli da je najbolji i najpametniji, te da samim tim nema potrebe da se mijenja. U tome se, ustvari, i ogleda sav apsurd tog mišljenja, jer je Uzvišeni Allah u Kur'anu časnom na više mjesta rekao: "**Samo oni koji su razumom obdareni pouku uzimaju.**"

Upravo zbog toga se vrlo često pitamo kako to da oni, koje smatramo pametnim, pismenim i školovanim, prave grješke koje nisu svojstvene takvim ljudima? Pitamo se jesu li oni baš toliko pametni, pismeni i školovani kao što se prikazuju u društvu? Pitamo se, ako su baš takvi kakvim se prikazuju, zašto se onda (kada ih opomenemo) ne mijenjaju i pouku ne uzimaju?

Činjenica je da se ne može promijeniti onaj koji ne prizna svoje greške, ko je sebi umislio da je on pametan a da su svi ostali glupi, da je on uvijek upravu a da su svi ostali uvijek ukrivu.

Tu predrasudu je još prije petnaest vijekova razbio naš Poslanik, s.a.v.s., kada je rekao da su **svi ljudi grijешnici**. Prema tome, i samo stvaranje kulta svoje bezgriješnosti jeste grješka.

Ali, šta kaže dalje Poslanik, s.a.v.s.? "**Najbolji grijешnici su oni koji se kaju.**" Pazite! Nije rekao da su najbolji oni koji ne griješe. Već oni koji se kaju. Zašto? Zato što nema bezgriješnih.

A onim pametnim, tj. pametnjakovićima, koji su sebi umislili da su svu pamet svijeta pokupili, Uzvišeni Allah u suri Jusuf šalje još jednu poruku: "**Nad svakim znanim ima znaniji.**" (76. ajet)

Iskreni vjernik to zna i prizna. Iskreni vjernik priznaje svoje grješke i kaje se. Iskreni vjernik pouku prima i mijenja se nabolje.

Braćo moja, to što se neki ljudi u društvu prikazuju kao veliki vjernici, što glume da je iman ušao u njihova srca, što umišljaju da su Božije evlije ne znači automatski da oni to i jesu. Možda nekom laiku tako i izgledaju, pa ih on na svakom koraku spominje i hvali. Ali, iskreni vjernici prepoznaju vjernike, kao što prepoznaju i glumce u vjeri. Jer, iskreni vjernici su svjesni i svojih i tuđih mahana i gledaju da ih odstrane i od sebe i od drugih. Iskreni vjernici rade na popravljanju i sebe i svoga društva. A zavidnim, ljubomornim i zlobnim zaista samo Dragi Allah može pomoći.

Dakle, da bi čovjek primio pouku prvo mora da prizna svoj grijeh. Kada prizna grijeh onda mora da se pokaje. Jer kajanje čisti grijeha a time i srce, a jedino čisto srce može da primi iman i pouku. A kada ih konačno primi, onda mora da pokrene proces svoje lične promjene. Uzvišeni Allah je u Kur'anu časnom rekao: "**Zaista Allah neće promijeniti stanje jednog naroda, sve dok oni ne promijene sami sebe.**" (Er-Ra'd, 11.)

Nema napretka ako čovjek ne radi na sebi i ako sebe ne mijenja. A kada jednog dana bude uspio da sebe promijeni, otvorit će vrata promjenama u društvu, čijim stanjem će onda svi biti zadovoljni, akobogda. I tada više nećemo jedni drugima biti iskušenje, već ono što Islam od nas i traži – braća i sestre.

Naravno, svaka stvar pa tako i promjena traži svoje vrijeme. Prisjetimo se da je dan uoči osvojenja Mekke Ebu Sufjan došao u muslimanski tabor da pregovara o uvjetima predaje Mekke. Kada je prije izgovaranja šhadeta rekao da mu (ni nakon 20 godina) u glavi još uvijek nije potpuno jasno kako Muhammed, s.a.v.s., može da bude Allahov Poslanik. Pa ga hzr. Alija pita: "Pa hoćeš li onda da ti je odrubimo?" A hzr. Bilal mu kaže: "Polahko, Alija! Nekome su potrebni trenuci, a nekome godine."

Završit ćemo sa još jednom porukom Uzvišenog Allaha: "**Ti opomeni! A opomena će vjernicima sigurno koristiti.**" (Ez-Zarijat, 55.)

Molim Dragog Allaha da nas učini od onih koji pouku primaju, koji su predvodnici u kajanju i uzori u popravljanju sebe i društva oko sebe. Amin.